



謹齋詩稿

淮海 許志進

己丑年



題天農讀書松桂林圖

用崑木
宮允韻

操刀有善割撞鐘無細響區區彈丸邑胡為君一往愛
此山水鄉鳴琴足幽賞先生優仕學為政應無兩萬卷
書城寬百斛醉鄉廣當其醕酲時得意已忘象森森松
桂姿風露迴蕭爽登樓一長嘯天宇劃清朗睽懷寄江
雲元度入遙想

天農留榻來鳳軒同賦志別

以讀書松桂
林五字為韻

己丑年稿

華軒舊雨來此夜爲君卜春燈照樽罍謾謾風敲竹倚
醉賡新詩相留對牀宿中年愴別緒好句殊難讀
扁舟戒明發挽留重躊躇捧檄趁官程勞勞畏簡書小
住豈不佳縱棹從所如有酒且斟酌何處非遽廬
山城着文吏舊是酒中龍深杯對殘編坐蔭多喬松此
邦山川窟蒼翠紛蒙茸南面百城尊何如酒泉封
我初縮銅符只以官爲戲君今試牛刀唾手看奏最餘
興托詩書五斗供一醉磨礮煩素心交契同松桂時陳君彥
瑜同行
東風吹凍雪寒氣生層陰盡醉不能別坐對春宵深遙
遙吳越程訂我相追尋蒲帆江上舟繫此千里心

贈覺津用岸齋韻

樹公修白業枯坐梵天深我亦出塵客來尋支道林清
風煮茶味夜雨聽鐘心五字同拈得寥寥空外音

訓鶴臯探梅之約

簷雨夜分歇夢回春思深言攜一尊酒共醉梅花林花在
城東

三十里劉
伶臺畔

晴日騎驢興荒臺荷鋪心朱絃彈古調疏越有遺

音

和心齋廣文求夏署中看梅二首

二妙憐同調梅花詠最清高寒自天骨香豔豈凡情一
樹迎春瘦三更帶月橫誰能耐岑寂索笑對杯鐺

彷彿羅浮夢閒庭幾樹花醉吟偕酒伴春色共貧家韻
冷橫經席香清隔座紗興來呼綠齒風月就君賒

寄懷丹菽臺長

京華遼海兩相親藥石言規記最真墨綬折腰爲吏日
青蒲觸諱上書辰收身林壑非充隱脫屣功名亦幸民
留得昔年冠劍在待君重與拂埃塵

與會符魯齋話舊二首

睽離歲月筭如馳把袂猶疑是夢思梁楚風烟彈鋏地
塞垣冰雪著鞭時壯懷未展匡時略褊性空慚 聖主
知悃悵舟車從萬里一牀燈火數行詩

霽夕雲開七寶裝嘯歌同倚次公狂醉歌枕簟看淮月
笑拍圖經說越鄉吳巘雲依湖練白樟亭潮掠海門長
舊游風物渾如昨北斗闌干對引觴

題友人照二首

道衣瀟灑稱閒身自號羲皇以上人白石清流誰領略
心期翠柏與霜筠

五十華年拍一彈神仙富貴總誇謾人間那得揚州鶴
坐對蒼虬碧玉竿

北溪觀荷分韻

滑笏波光浸碧空紅妝翠袖舞薰風蟬鳴柳浪千行外

人醉荷香十里中談笑任移書畫舫清涼如到水晶宮
興酣更展雙湖約萬頃銀塘一棹通

送會符魯齋同北上和留別韻二首

今雨能為翟尉留因風重買帝京舟離情易感中年後
客意渾輕萬里游補牘舊臣懷北闕揭竿新變廛東甌
浮雲遠目傷孤抱惆悵臨岐咏四愁

燕趙追陪客路同悲歌未怕阮途窮十年聚首風萍合
千里相思夢寐通往事轟虺蠻觸戰世緣輕薄馬牛風
平生壯氣難消歇盡寄河梁別緒中

靈隱十詠

有引

余在杭州爲西湖詩一卷屏山作志多見採錄獨靈隱詩不甚多頃閱元人李五峰十詩追和其韻屬會符寄之屏山也

靈隱寺

禪窟鎮名山林表露高闕仙靈栖隱處勝概標吳越僧
梵拂江雲桂子落巖月涓涓石泉流坐憩忘華髮

冷泉亭

孤亭照碧澗渟泓浸天宇鏗鏘玉珮聲風林失煩暑流
雲冷衣袂散作空山雨日暮無人來山魈隔烟語

蓮花峰

木末青芙蓉森然謝雕飾靈根玉井深翠葑金天側我
欲飲朝露不登殊自惜巖際餌松花毛骨定堪易

飛來峰

奇峰聳層霄軒翥失靈鷲剗鑿勞鬼神面目西來舊邃
洞豁地竅陰陽割樞紐迷離空翠痕風雨疑奔走

丹井

山中鍊形人不朽對泉石神丹熟九還一掬養靈液古
井守龍虎雲護苔花碧服食倘冲舉不假王喬舄

呼猿洞

荒涼洞門深知是猿栖處月明嘯夜澗雲斷挂秋樹空
山面壁人迷藏出無路隔水一相呼前林冥煙霧

水臺盤

窪尊寄中泚誰琢太古石應有謫仙人流觴泛元液羣
峰列几案幕天展地席臨流愛清泚一軟塵慮釋

翻經臺

臺上翻經人聲塵久岑寂成佛與生天山川總陳跡空
餘蟲鳥鳴嘈噴荒岩壁白雲淡無言悠悠自朝夕

高峰塔

孤塔聳高標湧出定千載何年燼劫灰世界渺滄海空
餘白毫光千丈騰殊彩山中禪定僧心空對青靄

龍潭

澄潭鎖白雲其下通水府裂石迴風霆知是龍潛處神

物臥空山槎柯鱗角古終當起奮飛爲天作霖雨

秋海棠爲花癡翁作

最愛秋芳傍砌生不關春色也傾城瓊瑰化淚和煙濕
露粉凝香徹骨清明月冷然應有恨艸蟲吟斷最無情
癡翁絕似孫惟信老向花間隱姓名

采菊和樸菴太守兼寄晴初

荒園有寒菊秋老亦敷榮色傲霜華正香留晚節清陶
家惟對酒楚客獨餐英採摘漫盈握幽人空復情

訓方舟二首

萬言漫詡楓宸褊性君知不可馴愚戇縱非經國器

清狂合作看花人雲飛北陸秋陰散香滿東籬雨氣勻
且欲共商風雅在先煩郢曲贈陽春
久無封事上嚴宸倔強依然氣略馴白簡青蒲徵讜論
紫螯黃菊對詩人風騷有主雲龍合覆載無私雨露勻
試看寒香貞晚節肯將搖落怨芳春

戲題程山人畫二首

兔眼迷離月魄盈桂花香處海天清蟾蜍未是無情物
解伴嫦娥過一生

撲朔踳躄桂樹偏何年乞得素娥憐人間底死營三窟
緣上青冥便是仙

求夏以菊花芥茗見貽子罕恰分惠泉一甕邀同
方舟小酌論詩別後却東

細雨密灑秋花枝名園分餉盈階墀主人不肯閒兩手
留賓共揀霜螯持花間坐聽匡說詩

時與方舟商訂漢詩說

談深酒

渴生心脾斜封初開陽羨蕊惠山乳水同時貽呼童急
爲撥新火砂餅試煮車聲遲一壑松風瀉石瀨半甌綠
雪溶花磁金莖華滋木蘭露何如玉盃擎峨眉撐腸萬
卷君苦飢猶能日飲從袁絲茶水况逢故鄉味蟹肥菊
綻醕酲時七椀解醒殊不惡賓筵授簡騁妍詞詩格謬
與鍾磬品水厄應受坡翁嗤作歌報謝三君子晚晴靜

對寒香姿

小疾

一室幽偏靜自持不須服氣咽華池無言已是安心竟
隱几居然喪我時始信衛生宜小疾人言勿藥得中醫
閒來悟徹逍遙旨隔座茶烟颺鬚絲

題嵇先輩遺像因寄介巖都憲先生

嵇公吐氣如白虹讀書談道攀軻雄清時致位二千石
掉頭歸臥長淮東武林遺澤明湖水甘棠垂蔭歐蘇同
石門都憲今汲黯舊植桃李榮春風蹇蹇批鱗八十叟
手排閭闔充赤棒喧厖身不死天留比開重瞳

我昔明庭司諫諍犯顏苦口敷愚忠不成請
且歸隱
夢縈北闕心忡忡感君碌碌斥餘子遠勞委屬披遺容
前輩鬚眉見彷彿後生盥致維桑恭即今道範煩凝想
宛如腹痛思橋公泚毫鄭重故人意銅山振響鳴霜鐘
是翁心貌兩俱古執雌守黑非凡庸騎牛把卷師李耳
對之知是人中龍諛墓得金嗤韓子作碑無愧綠林宗
題詩因寄石門老冠劍自拭塵埃封漢家重詔
丞相
茹芝好在商山翁

題友人照因送之豫章

詩中才子酒中仙名重人間二十年結客黃金豪士債

觀心白足現身禪筆牀茶竈攜游伴江月山風扣楚舷
此去匡廬秋色裏醉吟踏破五峰烟

詠黃山絕句一百二十首

有序

平生志禽向之游宦海奔馳蹉跎歲月黃山三十六峰近在江南歸里數
年未及命駕今年六月宜村王處士寄我五言絕句二十章讀而豔之乃
按山誌圖經採其名勝各系一首皆用五言絕句得詩百二十篇寫寄宜
村爲他時入山一段佳話或言子未至黃山安得作詩如是之多余謂
孫興公遙賦天台宗少文臥遊五岳余之
詠黃山用此例也乃題曰雲海臥遊集

芳村

黃山高幾許流雲覆村塢借問村中人不辨雲深處

湯口

藍田湯口路靈境入仙都五濁縈凡骨今來澡雪無

祥符寺

摧頽從石壁風雨暗煙蘿剝有文恭句年深字不磨

硃砂泉

澗壑饒丹砂寒泉沸溫暖肌膚冰雪人臨流自休澣

佛子嶺

山氣日夕佳羣峰簇高嶺人言佛子脚踏着天目頂

容成臺

丹成人去後山靜古臺荒不見容成子雲崖空夕陽

軒轅宮

神仙如不死軒帝至今在惟有黃山姿青青常不改

雲門

前登石碁嶺已見插雲峰更入雲門望蒼蒼一萬重

青鸞峰

天作光明鏡雲為錯綵衣凌虛自軒翥誰控碧霄飛

紫石峰

鳥道一千仞盤空紫石稜赤城標起處更上白雲層

香溪

羣仙湯沐地蘭茝日芬芳古澗飲麋鹿艸深溪水香

桃源

桃源問津處洞口自浮花試泛漁舟入仙家隔彩霞

藥鈿澗

不知混沌初何人鑿頑石涓涓藥鈿流盡是黃山液

白龍潭

澄潭圍白石中有蜿蜒姿雷聲殷前山知是龍起時

丹井

舐鼎乃得仙餘丹尚井底山間鍊形人但飲井中水

蓮花菴

未上蓮花峰且就蓮菴宿齒齒月明中青青三十六

鳴絃泉

怪石橫十丈地籟澄幽襟不用抱琴來風水饒清音

仙橋

凌空排雁齒天路迴岩堯萬古橫空翠何人渡石橋

白雲菴

菴中何所有菴上惟白雲坐臥雲菴裏雲山浩不分

狎浪閣

夢醒聞松濤軒窗接駭浪靜對與之忘心神兩怡曠

藏舟壑

誰藏壑裏舟應避波濤惡夜半拔山走天風捲叢薄

響雪

玉戲本無聲蕭騷衆山響荒荒雁宕流霧雨空千丈

下天

瀑布皆響惟
雁宕者無聲

辨源亭

亂石橫空澗寒松冷寺門坐看流水去誰省辨真源

硃砂菴

一壁渾丹砂誅茅事幽屏止此學長生不求勾漏令

得心亭

月出山逾靜林深鳥不喧悠然得心處欲說已忘言

仙人峰

仙人躡雲磴垂手更相招我欲往從之蒼茫雲海遙

鉢盂峰

不食伊蒲供空山覆鉢盂囊中餐玉訣乞與列仙驪

桃花峰

天半絢彤霞明星玉女家瑤池分異種開編絳宮花

老人峰

借問偃僂翁汝壽今幾許諸峰盡兒孫相對不我語

天門

修門絕人跡虎豹獰重閣幾欲排雲叫雲多暮景昏

前海

衆峰爭詭詭嗟峨不相讓遊人躋前海襟懷始一暢

玉蘭谷

蟻緣升天關猿投下幽谷君看登山難詎如下山速

觀音坳

癡兒臨絕險念彼觀音力安能仗佛慈為汝傳雙翼

小心坡

履危宜小心濟勝宜放膽小心無蹉跌放膽生勇敢

迎送松

巖前支離叟本自列仙種於世何作綠空山管迎送

臥龍松

蒼龍未蛻骨偃蹇荒山塢夜來雷雨驚之而鱗甲怒

一線天

放眼與天游赤霄閃晴電若作管中窺終古只一線

文殊坐

此非獅子兒詎得文殊坐應是餐霞人搢頤耐寒餓

娑蘿月

山深雲海闊何處娑蘿影風靜海雲收月在黃山頂

天都

天險不可登屹為天子障南面正宸旒諸峰拱相向

鍊丹峰

飛昇凌絕頂帝子有遺踪九轉丹成日焚香老一峰

丹臺

擬將一把茅結宇丹臺側不爲求神仙晏坐看山色
採藥源

軒岐採藥處復術生古香一徑穿雲去沿溪芝艸長
藏雲洞

岩堯雲際峰下有歸雲洞誰爲傳巖霖能發明王夢
石人峰

洞口服鍾乳雲表餐靈液笑爾古仙人山頭化頑石
芙蓉峰

玲瓏穿藕孔足躡石芙蓉手把青荷葉狂呼問碧翁
玉屏

碧落開丹嶂晶瑩敞玉屏人間五百里巖壑寫青冥
一片雲

盲風兼凍雨吹老碧雲根白石同凝結英英出岫痕
蓮蕊峰

青嶂簇蓮花翠黛攢蓮蕊玉井藕如船流雲冷秋水
石船

扁舟發黃海汗漫探靈岳輕風吹五兩挂帆殊不惡
浮丘峰

飄飄鶴背游神仙乃作俑漢宮甲帳人冰絲縛蠶蛹
疊嶂峰

雲補山凹白峰添樹杪青峻增高嶂合不辨淺深層
翠微峰

支筇巖壑裏黝然翠欲滴却望翠微峰蓮房綴青葍
上昇峰

軒皇叱龍馭白日此飛昇何處聞天樂雲中鷄犬聲
逍遙溪

經過洗藥澗路轉逍遙溪却訪阮公源更在仙都西

九龍

九朶青芙蓉蛟龍自相纏仄晝夜流風霆真作元黃戰

月塔

松影鋪石窟月色白於水不逢禪定僧風鈴語山鬼

碁石

仙人對奕處石上苔斑厚勝負爾自爲芻觀姑斂手

仙都

仙都渺何許雲外五城樓更上望仙峰雲海空悠悠

聖泉峰

一峰束腰鼓其上滄龍湫急雨射天池畫羯搗梁州

石牀

蒼松低偃蓋枕石意相忘醅酌席地人與汝上下牀

布水峰

峰頭挂玉龍久視目爲眩萬壑捲秋濤雲端一匹練
天柱峰

一柱擎圓蓋三辰正九州孤危莫摧折真切杞人憂
石門

雲中表雙闕松門石齒齒日暮何處鐘巖西翠微寺
雲外峰

衆峰與雲齊矯首出雲外青峭掃眉痕石州螺子黛
飛龍峰

飛龍何衙衙游戲雲霄間遙問雲中君垂髯當可攀
立雪臺

冥心儕木石雪埋腰不死不見亦不聞伎倆忘山鬼

達磨石

面壁凡幾年石上苔花澀無法說與人何勞深夜立
後海

前海靚且明後海宵以峭寓目不給賞千峰籠夕照
仙桃峰

一簇青田核峰蟠度朔根偷兒來曼倩失喜認崑崙
蓋鶴松

玉露零高蓋亭亭惹暮煙石禽中夜語寒色似堯年
懸度坎

曾為博臺游操縵悔懸度

衛仙博臺在太華東峰外緹鐵下縋復躋峻嶺一峰拔地立身空際攀鐵索自沃盡

力騰踴得彼索乃釋此索稍失手則墜萬仞壑矣癸未十月遊三峰曾至其處

不是陰平師登山耐仄路

蓮花溝

南游經濬峽不于堪一死

不于一回真堪一死湯霍林先生語

出入嶮巖中世

路危於此

千仞梯

流雲不可級黏壁化鼉鼈欲鼓登峰力還躋最上層

鰲魚洞

峩峩冠山姿釋負藏山腹川谷有陸沉支撐煩汝足

皮篷

皮篷泛後海烟水浩溶漾吾愛雪莊僧層軒啟雲舫

佛影峰

諸峰肖人獸萬狀恣所秉汝佛太狡獪底現莊嚴影

平天石

蒼松嵌絕巘鳥道與天齊誰云登天難試踏雲中梯

光明頂

山中步步奇幽趣各不領何處極大觀更上光明頂

石筍

森森不可束正及抽稍時扣石呼坡仙此豈玉版師

石鼓

河鼓森寒芒隋地化圓石爲擊警羣聳天聲震空碧
飛來峰

羣峭競翔舞一峰天際落昕夕御罡風虛空了不着
獅子峰

雲氣搏青壁獐猙勢有無拳毛底馴帖覲面見文殊
接引松

撒手過懸崖藤葛謝縈絆不逢接引松纔及黃山半
蒲團松

磨磚不成鏡叅禪豈作佛前身烏窠師請豎松枝拂
始信峰

人言到始信我到轉生疑山中難看山玉局真吾師

香沙

古澗香襲衣褰裳可徒涉流水不浮花平沙簇黃蝶
擾龍松

汝豈劉累植龍性得馴擾終當破壁飛怒色藏鱗爪
倒挂松

垂虹挂寒澗石壁古苔侵虬枝風動搖藤蘿繫鳥音
剖石松

砮斨纏古柯玲瓏穿石罅松石兩不分礫砢閱元化
棋枰松

玉局無平心文楸多界畫落子聽松風悠然忘黑白
松谷

松陰暗空谷逶迤行十里上映泐寥天下浸清冷水
散花塢

空明散花塢芬芳凝非煙窈窕散花人縹緲來諸天
西海

西海何寥廓鎔銀濕天表弱水隔飛仙何處認蓬島
獅子林

長松橫絕澗山靄日陰森雲盡水窮處隔林鐘磬音
臥雲菴

行踏雲中峰坐拂雲中石住以雲爲菴臥以雲爲蓆
天海

不到黃山頂焉知造化功憑虛看雲氣天海有無中
珠林

珠林黃葉寺松塢白雲房一徑封蒼蘚巖花生妙香
雲谷

相期雲谷遊欲下鐵師榻已拚玉腰圍留報金山衲
丞相原

有熊魚
山墓

魚山諫諍姿避世逃僧臘鬼艸幕紅泉松陰冷孤塔

五老峰

蒼顏五老人知自匡廬來為問浮丘伯何時鸞馭回
仙人掌

崢嶸太華峰曾踏仙人掌舉手排天闔身在黃山上
錫杖峰

曾聞兩高僧各占名山住君看卓錫峰正是鶴飛處
天紳亭

懸空九疊流縹緲垂天紳龍門三峽奇未足怡心神
仙榜

我本謫仙人人間成底事真靈位業虛何處列名字
木蓮花

芙蓉塞木末仙種譜離騷行歌招湘纍山深楚澤遙

音樂鳥

八音諧金石古調高咸英不煩伶倫吹異鳥傳元聲

石燕

燕燕零陵儔苔花黏石壁何事雙頡頏前山風雨夕

雙鴉

啞啞銜尾禽高飛還食肉送客軒轅宮迎舟道士狀

白猿

汝本巖壑姿其白緣多壽如何塵市人皓首成衰朽

連理樹

交柯還接葉對影不相違應有野鴛鴦朝朝成雙飛

木瘦

臃腫化奇木龍蛇縮菌蠢無用以自完天全謝繩準

五色雲

黟山以雲奇變現紛翬靄五色燦天章括囊收四海

山有東西

南北四海

四面佛

我相佛所空四面亦何有收將丈六身併付丹霞手

小華山

五岳游教徧希追禽向踪此生幾緲屐更上小三峰

水簾

珠箔水晶簾通明挂寒雨洞府仙人居金堂隔澗戶

洪中

舊業在名山奇懷委緇帙南面百城尊洪中方抱膝

棣園先生

我賦黃山詩因懷黃山人千尺桃花潭行歌招汪倫

老鐵

鐵公初居雲谷今居杭之佛日寺

越江秋水生擬理沙棠楫宴坐臯亭人空山脫榭葉

宜村處士

左冲賦三都作序須元晏續成斷句詩為君贄羔雁

題友人丙舍圖

棘人風貌自巒巒
蕭瑟亭臯落葉殘
陟屺未消風木恨
倚廬空寄畫圖看
穿階孝筍秋林綠
挂月喬松丙舍寒
欲賦匪莪歌罔極
泫然君恐淚闌干

和友人留別歌者二首

秦青重見不勝情
記得花間唱渭城
今日相逢無限淚
渭城重唱送君行

醉聽何郎一曲歌
迷離未覺酒籌多
酒醒便是天涯別
頭白燈前可若何

夜坐

擁裘獨對短檠坐
夜寂不聞長短更
濁醪醉引漢書熟
孤樹影搖霜月清
警寒白鶴時一語
催曉黃雞相應鳴
行藏暗省十年事
爐灰撥盡天初明

戲示明澤

竿餌東游失釣鰲
山川回首一蕭騷
孔融自不留元節
優孟何勞肖叔敖
樓閣秋空蓬海市
波瀾夜捲浙江濤
絕交論廣知無益
腐鼠飛鴟氣正豪

喜雪三首用樂城集中韻因寄上漁洋先生

饑饉頻仍未絕書
初驚瑞雪仲冬餘
豐年有喜陰陽順
荒政無嫌補救疎
寒捲北風傳夜柝
潤添南畝入春鋤

水鄉待哺哀鴻集珠玉漫空定不如

盈尺曾因紀瑞書一陽纔復返寒餘黃鐘應律飛葭動

白雪彌天集霰疎鹽絮鬪才呵凍管蝨蝗蟄地報深鋤

君恩更給新年復綸綉春溫挾纊如

時有詔赦江南山東河南田租一歲

坐愛庭光瑩入書風簷浙瀝夜深餘冰生硯滴詩思潔

花掠梅根鶴夢疎耳御寒歌噴玉黃精苗損悵攜鋤

吟詩舊憶師門立持視鄒枚恐弗如

先生在京時用昌黎雪詩十首舊韻唱和獨邀歎賞

和東坡集中歲暮鄉俗三首

并引

歲晚饋遺謂之餽歲酒食招呼謂之別歲除夕不睡謂之守歲語見東坡集中此天下通俗不獨蜀中然也余特以歲序推遷百年同盡饋者別者守者自多紛擾不如冥心任運與時消息之爲愈也和詩略反其意放筆因一笑焉

鄉俗重歲時餽遺迭相佐苞苴各緣情細瑣到百貨君子慎取與纖芥寧論大高門鬪豪奢茅簷困僵臥分減逮貧薄此語誰書座右節物遞遷流今古蟻旋磨萬彙均芻狗伏臘從虛過崢嶸感歲闌古調賡誰和

右饋歲

年華有代謝志士悲衰遲夸父逐羲輪勞勞安可追去者逝不留來者誰爲涯露電百年期俱往無還時祀竈請比鄰醜酒割鮮肥高歌擊唾壺盡醉歡且悲歲往難爲留觴到忍固辭悲歡更相閱齒髮欣未衰

右別歲

萬事一杯酒得喪同畫蛇後成乃先飲添足誰爲遮別
歲不盡歡守歲將若何笑彼羣兒愚雜坐爭謹譁不如
盡醉眠夢聽街鼓過寒盡春自生斗柄行東斜行樂及
芳時無勞歎蹉跎敏手運鴻鈞巧捷從人誇

右守歲

謹齋詩稿

淮海 許志進 念中

庚寅年

水仙花

羅襪凌波不染塵水晶宮裏浣花身暗香玉雪消魂夜
知是湘妃是洛神

歲朝和鶴鄉韻

胸中塊磊酒澆除客裏窮愁詩掃除索居今夜今年除
豈知明日明年還索居肝膽向人懷抱盡牀頭剩有遮
眼引醉之殘書莫恨讀書人易老不如錦衣白馬兒郎

年紀小傀儡俯仰隨他人爭如賦詩飲酒閒居好此生
定着幾緗屐坎止流行付周易歲朝痛飲且閉門昨夜
雪深門外泥一尺

戲贈曹道人用東坡清虛堂韻

聃老騎牛歸流沙紫府羣仙空作衙人間天上不相及
掣電過眼飛空花白日冲舉何所事雲中雞犬知誰家

葛洪丹經我曾讀悞人蝙蝠如烏鴉

葛洪丹訣千年白蝙蝠其大如鴉食之長生堅瓠集

載人得白蝙蝠食之立死

道人強健老耽酒自言落拓隨風葩金丹不

須養龍虎留取石鼎供煎茶容成房中多自悞走馬脫
轡紛鞭撻不如痛飲加餐飯到頭一穴青山爬細數三

萬六千日隙駒過去成咨嗟神仙不死定安在吾將就
汝餐朝霞

上元前一夕二首

誰家鉦鼓夜闐闐一室明燈靜似禪節近上元風月好
不拈酒盞亦陶然

喜無風雨鬧春燈弘景樓開最上層獨坐深宵對明月
靜中風味幾人曾

十五夜感興三首東求夏

燈花閉戶伴癡頑好月何當風雨慳夜蝕妖墓靈曜晦
誰從天步拯多艱

是夜月蝕

水晶簾外百枝燈人在瑤臺第一層
沸耳笙歌天上夜醉題詩句記吾曾

浩魄仍隨珠斗懸一年難見月常圓
梅花枝上春多少試踏燈宵訪鄭虔

春宵讌集酬岸齋太史二首

上元燈火散春城初試香芹碧澗羹
柏酒煥浮花月影桃鬟清逼管絃聲
功名夢寄游仙枕詞賦才高子墨卿
邾莒陋邦聊一軟敦盤安敢擅齊盟

翰林提筆壯詩城五味親調玉鼎羹
娛老夜耽文字飲徵歌心折步虛聲
王濛醉舞誇劉尹漢武同時惜馬卿

我亦偏師當大敵春筵燈月記司盟

挽劬齋司寇

左掖清班奉典型臯繇明允佐祥刑
抽簪海岸三年別扈蹕江潯兩度經
廊廟經綸非夙昔鄉邦耆舊半凋零
金焦樓閣浮雲裏記看春潮晚岫青

丁亥扈蹕江南同登北固山巔慨然有歸老之興

檢舊稿有懷沁州相國先生

封章重疊記櫻鱗愚戇頻生上相嗔
豈有諫官求識面也知忠直定危身
孤臣去國論朋黨片語回天惜正人
一紙辨奸留舊稿九原隨會獨沾巾

玉帶生歌和汪子因寄漫堂中丞

天風吹斷浮海槎，厓山事去龍爲蛇。信國檻車走萬里，
乾坤萬事皆蹉跎。平生一片端溪石，茫茫浩劫追宣和。
朱霞朗映補天手，昭回法象明長河。庚庚橫理號玉帶，
當年定得千摩抄。此生天骨自寒冷，孤蹤磊落江湖多。
君不見宋宮草棘埋銅駝，六陵玉匣移故地。何況區區
硯石流傳異代經，兵戈商丘老中丞。學殖攀丘軻，一生
嗜古乃成癖。往往窮搜金石空，巖阿玉帶生從何處得。
寶物定有真靈呵，黃山汪君門第華。沈酣典籍工吟哦，
南金東箭世所貴。珊瑚鐵網歸搜羅，雲龍相從匹韓孟。
居然游夏登四科，筆鋒割取精球瑯。墨浪撼動生龜鼉，

吟詩喻意紫衣叟，清言欲駕前賢過。蘇公亦有云，吾硯
累累惟兩手。手或先壞剩此塊，石將誰磨中丞老。健方
著述堪將壽，考誇髯坡廉者不求貪。不予高齋歲晚終，
無他硯兮硯兮將如何。倚歌而和爲生歌。

病起讀書

一榻陳編足退藏，未應愁病兩相妨。病緣嬾入中年倦，
愁爲閒生白晝長。去日漸多來日少，新書難讀舊書忘。
壯心未歇韶光駛，老大逢春意轉傷。

村行

沙岸停舟晚日明，板橋疎樹背溪行。天橫海月三分白。

水浸溪田一掌平。柔柳抽條春正暖。飛蟲撲面蟄初驚。
閒情漸與農功習。愛聽耕夫叱犢聲。

高郵夜泊

二月顛風作怒號。危城一帶捲驚濤。湖聲雨蹴寒潮急。
塔影晴懸海月高。水國魚鹽喧夜市。沙堤版築歎民勞。
何人乞與安瀾策。併引春流轉巨艘。

仍園賞梅二首

眼明千樹鬪韶光。惱亂東風盡意狂。二月輕寒侵薄蕊。
三更微雨點繁香。金尊圍坐花爲幄。玉笛吹殘雪滿牀。
醉凭曲欄燈外看。橫枝錯認美人妝。

名園占斷十分春。夜飲厭厭忘主賓。積雪自明無月榭。
濃香分襲按歌人。孤山句好高難和。天女花飛近着身。
盡醉便留西閣臥。夢迷香國不須茵。

賞花夜歸雷雨大作却柬

繁花爛熳映樓開。夜雨驚雷二月纔。酒醒夢回疑破柱。
燈紅蕊白記銜杯。何人睡態矜妝額。此夕飛英掩濕苔。
惆悵餘香衣袂在。羅浮應有夢魂來。

贈去非

昔年曾是訪幽居。對榻論文最起予。一姓弟兄俱有集。
同時父子總能書。遂良筆法錐難畫。衛玠丰標玉不如。

贈我驪珠三百顆肯教容易換碑礫

謝友人惠蘭

同心久已契如蘭况得家山幾箭看根坵泥封防雨濕
花藏葉底護春寒採從空谷芳香遠鋤戒當門種植難
歌罷離騷紉楚珮銀缸一穗坐更闌

梅花

四首求夏座間作因東岸齋太史

幾夜風吹凍萼舒南枝驚喜着花初冰霜有力生香色
煙月無情趁碧虛映水斷魂愁寂寂空山獨笑影踈踈
主人正有傷春思忽漫相看總破除
遮籬傍竹報全開刻楮天工費剪裁瘦逼寒柯融臘雪

肥侵春雨養莓苔生香活玉寧論價穠李妖桃敢浪猜
自笑廣平心鐵石賦才消盡數枝梅

冰雪肌膚萼綠華珮環初過上元家鶴歸夜月空山潔
酒載僧船碧水斜妝倚壽陽人獨臥夢迷香國路偏賒
橫枝驗取春深淺玉笛休教奏落花

城北城東萬樹齊杖藜春酒日須攜未論結實調羹鼎
坐惜飛英點雪泥林際春申詩最好酒邊何遜醉應迷
先生興劇饒清賞試爲梅花賦着題

上巳禊飲即席和汜雲四首

東風吹出淺晴天花笑無情柳帶眠不少山陰詞賦客

便如修禊永和年

為惜春光強半歸
娛情絲竹領清暉
歌兒不用纏頭錦
自有飛花着舞衣

將相神仙事渺茫
邯鄲夢裏戲逢場
眼中春色濃如酒
止合相攜入醉鄉

醉劈雲笺賦冶春
名流江海聚陳荀
信知俯仰皆陳跡
好記蘭亭一輩人

咏海棠二首丹厓座上作

一番細雨助新妍
正是清明乍暖天
香泛崇光妃子睡
醉遊蜀國放翁顛
嫩晴十日春無價
纔放三分態可憐

最是泥人魂斷處
難消月下與燈前

嬌紅膩粉逞便娟
杏雨梨雲總索然
有色盡將春旖旎
無情誰把玉雕鐫
綵繒綴樹隋宮女
風榭持裙漢殿仙
便有蛾眉稱善妬
也須中酒伴花眠

糜粥二首

糜粥真能活幾人
要矜一勺使君仁
三更風雨奔馳路
十萬飢寒現在身
搜粟儘教胥吏飽
蠲貲先使富兒貧
救荒誰道無奇策
一郡饗殮減縉紳

枵腹休言仰縣官
新來芻牧貸芻觀
鞭笞儘為三征設
糠覈誰論一飽難
望歲預憂麩麥少
蠲租舊憶主恩

寬何人擬上佳時略蒿目雲天萬里看

雨中再咏海棠

好花真耐百回看帶雨重尋酒力殘濃豔十分春未老
輕陰三月晚猶寒風吹軟玉香全濕紅透冰綃淚不乾
燒燭更須成夜賞枝頭明日定闌珊

看桃花贈退翁四首

勝地春尋興不虛春光十里趁籃輿眼明瞥見花千樹
知是桃源靜者居
綠含新柳淺藏鴉紅入天桃彩作霞我刺漁舟來洞口
不妨閒坐說桑麻

垞南水樹映迴汀塢北煙霞入畫屏
坐鏡中花送酒
春風四面敞虛亭

牡丹含蕊葉初勻桃李花開一色新
若此風光不相賞
辛勤辜負種花人

看花歸過劉伶臺三首

柳暗花明是醉鄉看花亦不記誰莊歸來十里春風路
不訪劉伶訪杜康

臺上有二君像

羸軀豪客不須論花下醇醪帶月吞
偏仄塵寰天幕小
真教醉入酒人禪

醉死誰能問六骸春游且復趁青鞋
花間縱有劉伶鋪

滿地春愁不可埋

後樂亭藤花呈岸齋四首

荒亭纏蔓倚喬柯
院宇春深紫翠多
照眼朱霞晴日裏
轉嫌枝葉太婆娑

賜穀軒前發興新
紫藤花下日留賓
西施嫩乳麻姑酒
正好曹騰醉過春

枯藤亂委蛟龍蛻
紫穗低垂纓絡花
坐倚香風酌春酒
真疑洞府吸流霞

一番花放一回春
百尺藤依百歲人
戲語香山老居士

漫憐妖婦故生嗔

香山藤花詩又如妖婦人蠱惑纏其夫

古意倣玉臺體

黛淺蛾初斂
雲垂髻未交
轉枝鸚學語
逐侶燕歸巢
細雨丁香結
輕風豆蔻梢
王昌遞消息
姊妹莫相嘲

涇村即事示魯瞻二首

綠徧河橋柳色重
隔林遙聽午時鐘
布帆穩挂晴波闊
行過村南人不逢

稻秧針水麥初熟
楊柳搖風鱖正肥
記取涇南好煙景
林塘四月野花飛

定善寺

竹院茶鐺待客過
塔鈴無語午風和
綠房青子落花盡

楊柳陰中啼鳥多

江舟四首和師晦

去作江南客逢君江上人山川對空碧花柳歎餘春擊楫扁舟興忘機鷗鳥馴滄浪漁父詠邀我共投綸

六代興亡地驚波恨未平蟠岷迴萬里風雨憶孤征明月照淮水青山滿石城舊遊人共老惆悵自愁生

湘潭憔悴客獨往幾徘徊碧嶂浮雲淨澄江春水來豺狼空作橫鴻雁尚餘哀莫話升沈事寒潮日夜催

破浪長風險羣峰合沓高閒心寄漁艇幽興付松醪雲樹環天塹鼉鼉蹴海濤平生飛動意長嘯寄含毫

酬思飭二首

滔滔我亦舊知津同調天涯即比鄰八月星槎閩海上三年漁釣楚江濱狂言聖主全鈞黨危行清流學塾巾萬里長風看破浪扁舟能更訪陳人

不爲言愁也欲愁此生天地一虛舟素心鐵石堅無改世事煙雲過不留揚子多言仍贊易楚臣無賴更悲秋何當放眼環瀛外鯨背高吟共遠遊

讀友悼亡詩感舊二首

六十憐君齒髮衰心傷更寫結腸詞離愁倍感中年後別淚難揮老去時露井落殘秋雨葉風蟬咽斷夕陽枝

便教月沒將星替爭染安仁兩鬢絲

曾對明湖賦感秋無題十二迴含愁六橋韻事懷蘇白
七夕多生誓女牛夢裏山光人易老鏡中鸞影舞應休
因君更惹無窮恨風雨煙波愴舊游

泛湖得涼字

盛夏園林引興長柳陰荷影暗池塘蟬聲咽斷歌聲細
花氣濃侵酒氣香夾岸綵燈爭蜃市

兩岸園亭樹木張燈數百

一天雷

雨動秋涼

薄暮大雷雨明日立秋

木蘭艇子煙波闊拚送先生到醉

鄉

和信昭遊雲臺韻四首

天回海立認崩騰絕壑應潛太古冰笠屐輸君成獨往
寒雲千尺對閒僧

積鐵橫空紫翠濃嵯峨鰲背倚孤筇人間無地銷炎暑
獨立蒼茫海上峰

一宿檀林聞妙香紅輪夜半起青方海天萬里扶桑遠
笑看羲和轉太陽

滄澥奇多未盡搜雲峰十日小勾留徑須點對連鰲餌
六月空山擁釣裘

和邇求觀劇四首

演長生殿傳奇

人代茫茫感逝波華清芳草月明多霓裳舊譜翻新曲

不數香山長恨歌

萬古芳魂怨馬嵬珠沈玉碎事堪哀怪他杜李無情思

爭忍同譏褒姒來

少陵詩不聞夏殷衰中自誅褒姒義山詩未免被他褒姒笑止教天子暫蒙塵

驛路空傳錦襪香人間天上兩茫茫莫愁無恙盧家老

那怪風鈴怨李郎

紅燭清樽豔曲聞分明重召玉妃魂朝元閣下湯泉路

記撫蓮花驗浴痕

華清第二湯乃楊妃所浴池中有白石蓮花鏤刻絕工

惆悵詞六首

夢破秋衾月隱牀驚魂萌悵覓空房真將世上無期別
併入愁心怨夜長

翠袖輕衫簇蝶裙凝妝作意惜離羣分明一覺游仙夢
已趁清風化曉雲

有恨無情忍棄捐漫餘哀戚感中年髯蘇諱說朝雲死
更賦荒唐雲雨仙

樂天本意遣楊枝惆悵難爲錄別時今日便教開後閣
招魂空有斷腸詞

砌蛩落葉做秋聲欹枕先愁睡不成未免有情還自笑
英雄氣短愧平生

憂患頻年悵恨餘霜華已欲上頭鬢維摩一室秋風冷
更倩何人問病軀

重過

一坏荒塚女郎魂冷雨秋風閉墓門重過白楊西郭路
女蘿山鬼怨黃昏

閨七夕書感二首

聽雨挑燈怨夜長坐看蛛網上文窗人間枉却今宵閨
雲漢星沈不作做雙

靈風漠漠雨昏昏酒滴荒阡蔓草痕重上針樓一搔首
懶陳瓜果與招魂

酬襄遠學博二首

憐君不得意出處事全違薄宦空投老高齋靜掩扉藜

羹飢不糝玄草解還稀落葉亭臯滿驚心節序非

黔婁妻善病曲逆老長貧蕭城時將晚窮愁句最真挪

揄拚鬼笑骯髒得人嗔且刈公田秫時方清學田陶然付葛巾

和錢夫人西婉四首

豔說蘭閨士女才仙山樓閣洞庭隈生逢蕭史宜偕老

夢感慈雲證再來一榻琴書成畏友六浮花月盡良媒

使君故態清狂甚把酒拈詩話鏡臺王使君納聘偶效温常侍故事

海內誰量一石才美人家在水雲隈布裙椎髻梁鴻喜

玉洞桃花阮肇來跨鳳人爭誇鳳侶乘龍客信是龍媒

洞庭春色梅天曉占斷風流倚玉臺

謫仙人總負仙才遇合吳山越水隈天上黃姑傳聘後
雲邊青鳥致書來遲歸舊約堅無改納采新詩倩作媒
吟和白頭佳話在藝林壇坫擅妝臺

不分表耽姊妹才天教留滯越江隈石城畫漿迎歸去

金屋雲屏待字來

夫人小
妹未字

文綺乍停中婦織紅絲擬作小

喬媒柔腸俠骨知多少便認鴛湖是鳳臺

讀王使君新詩用和西婉韻題其遠遊小照二首

一卷新詩寫素心文章山水共清音蝸蠻戰鬥休論昔
蘇白才華獨擅今名士遨遊期汗漫美人風雅解聯吟
田盤舊跡羅浮路戴笠扶筇想再臨

放浪形骸認畫圖使君豪氣滿江湖道存龍虎黃金鼎
身寄仙人白玉壺五岳興酣年未老臨邛渴在酒堪沽
行將王屋峰頭去豫爲兒曹置木奴

時方求
田海上

近薇叅憲之任貴陽維舟過訪樽酒論心用前韻

贈別二首

京華閩嶠共論心望斷飛鴻遺遠音縞帶匆歡風自古
雀羅門巷雨來今牂牁客路兼天遠江漢雲山入醉吟
惆悵故人滄海別幾時詩酒共登臨

萬里旌旄入壯圖西南征路隔江湖待將霖雨甦荒服
自有冰心映玉壺河上扁舟留晚泊甕頭清醪爲君沽

舊知獨礪懸魚操肯爲千緡樹橘奴

題照三首

怪石喬松共寫神相看莫問幾分真科頭野服空山坐
料是無人識此人

燕頷功名那羨渠年來已似列仙臞平生自署南山長
可待官家乞鑑湖

萬疊蒼山行藥地千章老樹讀書莊華陽樓上陶弘景
白日青天路許長

又題照三首

乞得乾坤未老身橫流滄海任生塵松風水月渾無價

占斷雲巖別有春

五岳襟懷尚子平松濤萬壑寫天聲振衣獨嘯蓮峰頂
雲海平看下界清

捷徑虛傳處士名移文多謝草堂靈伯齡不厭青山住
止恐青山厭伯齡

題馮山人東田小景用元韻

披圖見東田悠然得所樂竹樹翳村流雲巒靄山閣策
杖爾何人嬉遊甘淡薄把臂願相從誅茅樹籬落山川
有如此終焉謀負郭

和師晦留別韻二首

六管諧宮徵伶倫解谷吹人推天廟器交托歲寒姿威
鳳方巢閣乖龍却戀池清樽論別緒披豁見心期
夜月南樓興涼颼絳蠟吹問年驚白髮拊髀愧雄姿蕭
瑟官亭柳相思春草池燕山二千里攬轡訂前期

題蛛隱照用漁洋詩韻

玉屑攪空翻堀堞寒柯凍萼甦塵浣主人清興滿林臯
大笑袁安只僵臥櫪下青駟飽斲棧霜蹄踣鐵追風過
探春十里報童奴衝泥未怕冰侵髀青羊氎子赤罽衣
鞭絲不受饕風剗南枝乍見蓓蕾明冷香已隔林稍破
灞橋詩思橫驢背定有珠璣隨咳唾不妨瘦句鄰郊島

自古高人屬寒餓憶昔草堂同映雪閉門矻矻追丘軻
廿年仕宦逐蹄輪雪窖冰天詎能那歸來養疴茅屋裏
自學蠶蛹困纏累銅坑西溪花萬樹青箬筇枝人幾箇
浮生悔向風塵老擾擾真同蟻旋磨羨君放浪愛長閒
無事焚香花裏坐羅雀門前訪翟尉大似藍田宴臨賀
雪中邀作看花行僕病未能先已瘳疲馬西風踏寒月
記向荒山聽鈴馱如今嬾散厭奔馳筋力雖強肢體惰
園林半樹惹春愁觸忤風懷吟口哆綸巾鶴氅相後先
雪裏敲驢迭賡和

送友入都和留別韻

載賡喜起佐薰絃觸熱嚴程趁一鞭文筆舊爲三館重
歌詩新遍六宮傳功名少日雲霄裏風雨新秋驛路前
自笑心情比古井波瀾未擬起寒泉
高飛燕雀傲鷓鴣世事都爲平等觀捷足從人紛結綬
後生幾輩競彈冠畫成莫更添蛇足道在何須問鼠肝
珥筆看君丹地立扶搖九萬起風翰

○漫想

錦瑟年華草露晞音塵望斷隔重幃秋深細雨芙蓉老
夜靜空梁蝙蝠飛殘結未拋雙綬帶餘香猶漬五銖衣
海山兜率知何處漫想招魂月下歸

○月夜

涼秋風露自生哀往事依依對鏡臺明月團圓歌些夜
桂花香處不歸來

○月夜疊前韻

音塵寂莫祇餘哀未筭吹簫上鳳臺靈藥好教分月姊
清輝夜夜海天來

○中秋夜

月光如水浸愁心厭聽空階蟋蟀音歡趣盡從秋夜減
鬚毛偏惹雪霜侵酒斟玉椀芳筵冷塵浣冰絃綺閣深
風味此時渾嚼蠟露零青桂動哀吟

八月廿六日風雨大作寒氣異常夜坐不寐有作
疾風作意戰秋聲猛雨催寒一夕成偶為變衰關草木
漫將災異詫昇平是年太史奏言
災異論罪有差刁調已凜冰霜氣浙瀝空
傷遲暮情洪範庶徵推未得一燈耿耿待天明

京江晚渡示王叟

三年不問京江渡重放吳船眼倍明日射江樓銜暝色
風吹秋樹捲濤聲僧船載月金山寺酒伴探春鐵甕城
今日登臨君健在舊游如夢迴關情憶丁亥三月與劬齋諸君
同游北固諸勝蓋不勝今

昔存亡
之感矣

曉登京峴嶺訪詹道人

一宿南徐岸濤聲徹夜喧江光開曉霧山色上晴暎更
訪前峰路閉敲野老門還丹有元旨重與問真源

僧樓夜坐

夜闌星斗照江天佛火經魚坐不眠一卷丹書尋奧旨
半生客路數塵緣青山缺處潮聲急殘月明邊樹影偏
獨倚僧樓重搔首蕭蕭華髮感流年

山村二首

村流隨地曲嶺樹抱山斜黃葉騎驢路青旗賣酒家天
高橫雁字水落見江沙知是重陽近溪邊有菊花
更訪前山去穿雲艇路長松鳴疑挾雨楓赤欲酣霜戍

圮知烽熄耕多識歲穰晚來江上望幽興寄鳴榔

雨留江上

一夜風鳴樹高齋靜掩關寒濤喧客枕細雨濕秋山曉
望江天闊雲邊白鳥閒平生舟楫興獨立對潺湲

與劉叟東濱坐話

鶴髮脩然八十翁相逢江岸話秋風著書欲法文中子
遯世何如河上公烟雨客樓山樹暝戰爭蝸角笑談空
一甌閒啜中泠水記在南徐古寺中

山中曉起柬詹叟

茲行亦偶然喜得山中臥江聲撼門闥山光照佛座北

風吹濕雲寒雨一來過幽人驚曉夢宴起安慵惰還念
山南老調息方枯坐那無篔簹興欲往妨泥泥澆着屐趁
新晴啁啾簷雀賀

贈劉翁

樸學知君有別傳能從故紙覓真詮談經更補諸儒闕
贊易恒叅太極前經世壯懷人已老名山大業許誰肩
元言草就無人識更待揚雄五百年

潤州南山中作

溪山引幽興筍輿信所之風日喜新晴烟光動鬢眉山
家翳竹樹黃葉紛離披耕鑿似太古刈穫方及時行行

轉前峰臺殿岌屢屨登高望江色秋水翻明漪英英孤
飛雲遥遥當何依閒心付屐齒作健忘飢疲欣逢有酒
家且復澆詩脾人生一飽足興到成娛嬉過去總陳跡
安問岐路岐吾愛劉伯倫荷鋪以自隨

山村

亂山松竹弄晴光蓆帽風生九月涼節近重陽楓葉老
村家過雨菊花香

招隱寺

步入松篁一徑斜青山還繞戴公家空餘古寺圍黃葉
不見啼鶻趁落花獅子窟荒飛蝙蝠

洞中白蝙蝠甚大皆倒懸石上

昭明臺

圯走麴麴僧雖不惜巖前水愛客幽尋爲煮茶

自招隱轉夾山寺登閣望江

長松歷落搖風磴修竹檀園隱綠天樓閣迴臨初地出
烟霞猶似六朝前撲簷秋色晴峰外照眼江流白鳥邊
人代茫茫形勝在開山重說舊因緣

鶴林寺題壁

唐詩因過竹院逢僧話又得浮生半日閒即此寺也

得半日閒尋古寺不逢僧話自清幽鶴林臺殿餘修竹
米老風流占一丘荒草斷垣游鹿豕長松白石見孫劉
人間俯仰成今古獨立蒼茫紀勝遊

再游鶴林寺

殘碑缺落蘇仙字古井荒寒劉氏泉指點舊游纔幾日
追思陳迹又他年空山住頓留元素破寺伽藍着米顛
重拂蘚痕題歲月亂蟠蛇蚓尚依然

京口雜興四首

潤州城外客樓閑閱盡興亡滿眼山豪傑併吞餘狼石
英雄失路認昭關衣冠自喜無人識江水真應笑我頑
竟日憑高對空濶金焦寂寂鳥飛還

望裏秋光入畫圖丹楓翠柏照寒蕪三千疏鑿嗤秦政
百萬樗蒲笑寄奴雲擁亂峰通地肺江翻夕照走天吳
閒閑且買丹陽酒醉閱滄桑付玉壺

憑欄乍聽北風鳴地軸搖搖浪不平玉粒萬艘開海道
牙旗千帳列巖城繪圖誰鎖江天塹兒戲休論北府兵
蹴踏蛟鼉蕩天水中流擊楫古今情

形勝空標異代餘寂寥羈客坐憑虛雙旌弩矢誰驅馬
一葉煙波看打魚青峭數峰顛米宅荒涼五畝戴顛居
詩成吟望懷丁卯管領江山愧弗如

○八座

江頭千騎壯行臺八座風威海岬開車走范曄夢問訊
餽非陽虎漫呼來移山有力驅頑石吞象無人拔巨虺
枉說張綱能抗疏豺狐相倚正轟豕

金山贈僧

千尋浮玉挂晴暉萬頃玻瓈接翠微每上山樓望空闊
便成吟嘯坐忘歸倦游徑借禪牀臥往事休談玉帶圍
汲取中泠試新茗江平如鏡白雲飛

○九日憶弟

江干霧雨暗朝暉九日題詩坐翠微笠屐登高妨獨往
煙波極目苦思歸長淮淼淼銀鱗隔北固蒼蒼鐵甕圍
獨把霜螯對樽酒拂雲征雁看羣飛

重九後一日偕王叟又旦初陽道人由銀峰過嶺
游九華登峴山訪戴公隱處並喬村松徑上五

州山坡陀竿确登頓殊勞小憩因勝寺尋蘇公
遺蹟轉北峰捫藤葛上絕險處大江南北一覽
而盡循山背細路下訪李氏村居小飲江干茅
舍踏月而歸作詩三首

風雨壞重陽客舍意殊惡朝來趁晴旭更理登山約銀
峰轉盤紆發興試芒屨王君老好事顧盼矜矍鑠嶺路
躋高險西風吹帽落觸緒一撫掌此事已云昨初地蔭
長松九華凭傑閣罨繡動江影雲氣散城郭道人殊狡
獪誘客升岞嶸鼓勇峴山巔諸峰紛繡錯風濤振林木
村壟繪巖壑南徐衆山圍龍虎互蟠攫江漢此朝宗厚

力恣芻礪云何割據雄劇於烏巢幕興亡六代事雲山
同寂莫空留隱士居崢嶸對黃鶴

登峰興不極幽尋意未已一徑轉空曲青松帶迤邐言
循樵客路誤落雲濤裏仄磴初窘束高嶺漸喂囁西南
山所族百狀逞恢詭森嚴羅劍槊猙惡鬪奇鬼鬱嶂兀
蛟鼉紆詰走蛇虺峩峩橫海鰲轟轟將軍壘扳緣不得
路累歇氣殊靡途窮徑開闢跳踉僧雛喜古寺隔雲煙
五峰插天起疎磬出林末日車傾斜晷風高鳥不到流
雲冷秋水因專丘壑趣轉悟達生理高臥看滄江抗懷
子蘇子

紆徐下山路岡巒互迴複五州尊居中羣嶽互臣僕
確轉幽居秀麗入林麓煙嵐隔遙望回看隱深谷幽人
不可逢惆悵懷高躅出谷循江滸洪濤殷地軸逸興對
樵漁麤糲且充腹江魚膾入饌村酒瀉初縮是時月上
弦薄暮已生胸林昏翳鳥聲人影亂松竹遙聞何處鐘
清颼吹斷續勝游偕靜侶山晚興未足此行補登高歸
採一囊菊夜闌客自去題句慰幽獨

不寐

一椽假息寄江城載酒青山十日行夜半江聲雜風雨
祇應羈客最關情

金山雜詠十六首

朱樓碧殿照明流山鎖行宮幾度秋
突兀江天澤心寺
如今真合號龍游

奎藻天章映綺霞

乙酉三月 上駐蹕金山書金剛經留之寺中

梯梁空說寫楞伽妙

高臺上繙經坐竟日無風自雨花

澄潭黝黑俯蛟宮雲護龍歸夜幾重
三禁堂開方丈曉
道人無語打寒鐘

上盡僧樓上佛樓江光山色兩悠悠
悠悠風傳隔岸人聲遠
半是揚州半潤州

薺樹烟凝暝色遙瓜洲鼓角動晴宵
鷓鴣山外潮頭起

不到當年揚子橋

周郎年少武侯才組練長驅魏帝回
一簣蒜山天塹遠
隔江空有賦詩臺

折戟沈沙閣海鯨營屯北府任優游
曾聞戰艦三千柁
韓滉軍容壯石頭

戰敗江干十萬師奇兵設伏水仙祠
連檣火箭飛灰後
驢背看山又一時

六代興亡事若何蒜山閒地已無多
江天一色清秋月
醉聽袁絢水調歌

拈花一笑豈前因磨衲清顏雪竇身
解識金山無量相

禪牀準擬借何人

中冷一斛汲清深舊譜爭傳張又新能向山僧修水遞
贊皇除却更無人

舊說齋廚法豉香漫誇一斗博西涼燒豬釀酒山僧事

誰論醺醺日幾場

張祜金山詩因居近
城市終日醉醺醺

景純遺蛻枕驚濤落日鼉鼉氣更驕欲賦游仙招毅魄
一江風雨上寒潮

江海襟喉鎖鑰雄蛟龍窟宅鬪艤幢樓船自昔稱王濬
水戰何人習呂蒙

自哂身如不繫舟江山吟嘯亦風流題詩恐惹江神笑

也擬求田傍潤州

江心鑄鑑奉君王金界空留玉鑑堂好把江天作明鏡
更將日月助光芒

焦山雜詠十首

江海光凝一鏡寒金焦雙峙水雲間遊人競上金山寺
若箇幽尋到此山

隔岸孤峰對石公隱君千載挹高風仙人抗手雲中路
誰作長橋架彩虹

子陵瀧外客星居臥雪孤蹤未遜渠幽勝一探三詔洞

故應此地着蝸廬

焦先蝸牛廬在河
東未嘗至江南也

袁曹作橫掩炎精邕或才高盡毀名殺癡牂羊歌祝劬
隱人心事定誰明

焦仙祠外鎖蒼苔鶴去空山更不回木鑽去聲石盤誰得
力空煩舐鼎向丹臺

淼瀾鯨波障海門滄桑容易變朝昏古來惟有松寥月
夜湧寒潮照水痕

斷崖松石鎖澄潭海色江聲映蔚藍倘許餽糧分白石
徑須佳處結茅菴

踏雪來探瘞鶴銘崩崖殘石暮潮青不須更較朱陽帖
結體端嚴自典型

彭亨贖鼎重人間南仲螭蟠見一斑時世近來輕法物
獨留寶器鎮江山

崖邊題字不成行歲月依稀紀晉唐絕勝金山千片石
幾多惡句浣碑廊

北固山雜詠十首

第一江山最上頭西風脫木重來遊樓高意遠龍州句
爲汝言愁也欲愁

畫圖不見僧繇筆棟宇仍留孫皓年一帶山川辨吳楚
昏鴉落日暗江天

天水蒼茫島嶼孤潮連江海入饜餬三山出沒烟波底

大似元章海岳圖

蓮花翠釜失蕭梁劫火浮圖認李唐借問吳淞登峴字
何如李密見秦王

華蓋龍池想作圖空教淚滴玉蟾蜍滄桑寶玩皆塵劫
至竟江山換得無

狠石依稀廢寺芻風吹草底見眠羊怒蛙作氣思飛將
合置山前閱武場

一菴空鎖淨名天五百誰叅廣照禪度閣經函難校補
老僧拄杖易規圓

萬里長江勢盡來地窮山到海門迴江山換盡齊梁劫

搔首青天眼倦開

社鼓神鴉護將壇佛狸祠下暮江寒孫劉去後休懷古
只有當年辛幼安

柳岸沙塘烟景新三山地迴不生塵江風海月無常主
惟有閒人是主人

容城道中示王逸人

筍鞋藤杖日尋幽更爲茅君入蔣州山走南徐皆北向
水分東嶺自西流夕陽過雨不多點古塔迎人出一頭
聞說華陽訪真隱此心已共白雲遊

宿句曲道院

羈栖斲與一壺同夜靜秋聲皓月中彷彿陶君栖隱地
三層樓上聽松風

送王叟入茅山

又別三山麋鹿羣獨登便闕訪茅君懷仙洞府探真誥
贈我山頭寄白雲樓畔松風塵夢醒壇邊芝草玉童分
裁詩便當游仙曲未羨當年十賚文

茅山道中懷王逸人

舊識華陽古洞天三峰空翠故依然重尋上界仙人宅
自謂平生道氣全石室高攀雲路近金堂遙隔曉烟懸
興酣徑欲凌風去知在茅君杖履邊

弘濟寺題壁步新城師舊韻二首

江舟望飛翠步屨凌松關青峰翳白雲鳴鳥聲闕闕長
廊轉高閣濤影翻秋山俯仰感昔遊塵壒凋朱顏

素衣拂緇塵重踏青涼境山靜雲亦閒愛此白日永蜂
聲花院幽桐竹寫秋影拾級上危磴縱眺收羣嶺興亡
辨前代勝概江天迴風帆下吳會潮汐通夔郢離離白
下城深樹含烟景往來纔幾日及此秋飈冷山氣晚淒
清月出衆峰頂

○燕子磯步韻二首

孤峰聳奔濤積雨苔痕黑晴空動鱗鬣突兀蒼虬色崩

石欹水影白日蛟蜃匿名山表天塹鎖鑰控都邑燕子
故飛飛興亡恨誰識

塵寰役役空欲老廿年重登江上磯興酣舉酒對明月
一聲長嘯秋雲飛松濤暮驚風謾謾漁笛夜靜聲依依
明朝日出渡江去鄉心已逐歸帆歸

魏文帝賦詩臺二首

橫槊臨江事已非西陵塚墓艸離離雄兵那擬過天塹
且復登臺一賦詩

一代雄才冠建安賦詩空歎水漫漫孫郎帳下兒應笑
莫遣江東子布看

○金陵道中

侵曉籃輿入翠微金陵形勝記依稀山連吳楚江天闊
水下嶓岷海道歸松壑濤聲喧谷鳥雲巖晴色動秋衣
舊京風物渾如昨却望鍾山氣象非

明太祖陵二首

故宮荆棘沒銅駝異代心傷麥秀歌秦地山河猶似昔
長陵丘壟孰爭多龍孫事去空遺恨燕子飛來其奈何
落日登高望京邑鬱葱佳氣暗烟蘿

寢園長奠舊神京形勝依然壯石城儀馬玉衣何代物
大風猛士故鄉情山川草木含靈氣風雨雷霆感聖

明讀罷豐碑重搔首道旁華表發金聲

清涼山中

山色蒼涼拱禁宸入山已覺遠囂塵行穿蒼翠疑無路
嘯出煙霞知有人桑海遺墟僧寺在齊梁殘劫市朝新
江天草樹秋光裏竹杖芒鞋訪隱淪

○宿桂山村舍

風吹嶺樹葉蕭蕭疲馬孤征覺路遙石壁暮鐘尋廢寺
荒墳殘碣認前朝村深野老衣冠古霜肅秋原虎豹驕
薄暮山家具雞黍一杯吟嘯坐深宵

○初度日山中書感

空山羈客路此日倍傷神風木無涯恨乾坤有用身白
雲秋樹晚黃菊酒杯新遙切原鷓思依依爲遠人

海岳菴歌

君不見丹徒兩劉布衣雄擄捕百萬梟盧空又不見周
郎年少好奇策虎爭龍戰徒相阨何如北固山前五畝
宅換得纔消一拳石硯山盈尺易江山兩公不識誰廉
貪千載空留米老菴山光掩映江天涵戎馬蹀躞臨江
潭老兵彌勒時同龕淨名堂外橫軍壘海岳風流嗟已
矣

龍潭

閉室滯塞抱

江雲漠漠樹含煙一帶離宮古驛前寂寂頽垣閉秋草
翠華臨後又三年

下鼻塘轉破岡路遊峴山寺晚過夾山作

路暮晚感月
勁鼓勇繁健
映向照迎洋
晚與老同刻

翠竹白沙江上路筍輿十月事幽尋乍寒爭暖風初勁
欲雨又晴天半陰巖壑映人迷古寺丹黃滿目絢霜林
晚來更訪夾山去隔水風傳鐘磬音

遊八公巖

迷斜依稀移
厭怯畏恨忘

一徑入幽谷潺湲流水聲修篁迷蘚徑落木蔽禪荆地
僻尋僧話林深厭鳥鳴行歌招隱曲搔首愧浮生

石松精舍

景物南徐處處幽銀峰孤刹遣羈愁平添木杪三層閣
橫攬江天九月秋水石清暉生旅夢雲巖深秀記勾留
何時結屋依松竹玉帶山門榜舊遊

○晚行高麗山中

日暮入山谷蒼蒼雲樹昏亂峰青靄合幽澗碧流奔路
僻樵談虎林荒客聽猿疎鐘殘杵歇破險得孤村

○旅夜感懷

碧天孤雁背霜飛歲晚空山悵未歸此夜最思慈母線
西風吹綻老萊衣

○雨宿白兔

夜寒一茲殘

舊消魂處酒重斟暮雨蕭騷對客心惆悵夜燈衾絮薄
和風和雪坐深深

黃岡寺

清殿新明晴
入下過滙至
野山村荒溪
喜幸欲願羨
陽截遮冲權

白兔岡頭夜雨晴高麗峰外雪痕清雲籠曉日寒無色
水入溪田沸有聲野店甕香知釀熟山程泥滑喜裝輕
長松隔斷黃岡寺踏破蒼煙僧出迎

京口詠古八首

三山縹緲勢凌雲極目蒼茫海嶠分千古名言荀令則
褰裳濡足有秦君
未厭東南王氣銷赭衣徵發歎民勞興亡世事如江水

見識是入說

惟有青山見六朝

丹陽北固古吳關江抱重城海抱山不見周郎破曹處
碧天如鏡水雲閒

劉毅家無擔石儲擣菹百萬競呼盧建康乘運皆人傑
豈獨英雄是寄奴

勾吳遺事說朱方天厚淫人以富殃黃鶴山前招隱路
戴公山外野梅香

外甥豔說何無忌生子人誇孫仲謀一帶江山殘照裏
西風回首杜鵑樓

老典桓温北府兵郝惜惟合飲京清若教勦力匡王室

人誇何堪
黃姓同

終遣扁舟越嶠行

洪濤竟日捲千檣巖畔垂綸意自長一釣鱸魚四十九
金焦掀浪正茫茫

長山龍神祠

一桁青山列畫圖蒼松翠柏照寒蕪峰迴黃峴趨京口
水滙泉源下練湖落木林塘秋颯沓靈旗風雨夜饜餬
村巫醮祭紛歌舞日暮龍歸知有無

送仲掄弟旋里

山川如畫對齊梁兩月江天集雁行野徑看雲常並轡
僧樓聽雨亦聯牀棋逢勅敵鏖殘劫詩寄閒情續短章

送汝扁舟沙岸別一襟歸思逐鳴榔

○陳少陽祠二首

獨木枝危厦無人切杞憂上書秦逐客危行漢清流遺
恨啼鶉晚招魂楓樹秋冬青六陵路風雨暗荒丘
觸諱忘身賤多言尚口窮書生不解事丞相自孤忠濺
地血凝碧經天氣吐虹成仁龍比志今古恨應同

贈別詹王二叟

可是江山苦泥人清游兩月滯江津江含風月寧論價
山買巢由不厭貧地肺探時秋色晚天心復處靜尋真
自嗤許掾終凡骨重訪仙源定幾塵

○高郵夜泊

數^上日催歸棹澆愁問酒壺黃蘆戰風雨清夢雜江湖
水國魚龍蟄冰天雁鶩孤勞生厭行旅歲晚尚征途

與滋菴夜話醉歌

世事翻騰晴雨虹滔滔逝水江河東別來情緒那可道
但驚鬢鬢霜華同把卷謬誇新句好劇談快論昭發蒙
清樽耳熱衡往事燭光炯炯明雙瞳董賢年少致司馬
崔烈銅臭稱三公天下皆知 杞奸青史獨標胡廣庸
何人致君堯舜上侃侃直節抒公忠可憐成敗論事後
老成巧捷輸兒童醉語喜君狂態在清觥 夫倒尊壘空

夜深起舞歌慨慷同雲黯黯天夢夢

○題飯牛圖

碧草烏犍馴擾南山白石嵯峨身是單衣甯戚狂來扣
角高歌

春水淼淼淺碧綠楊冉冉風和弘景畫牛嚙草伴君雨
笠烟簑

和松南韻

江表雙旌候騎催飄飄鳧鳥自仙才吳山越嶠傷離索
雲錦天機試剪裁酒債荒城官俸少詩郵歲晚衲僧來
筠籠三百清霜後香霧霏霏帶雪開

○雪獅子和韻三首戲東

鋸牙鈎爪似胎生穩臥冰天獨老成
雨雪三冬呈瑞應風威百獸禁喧爭
寒凝積霰清無匹猛訝驚雷怕有聲
里巷兒曹從作劇漫疑馴擾逐人行

玻璃滴乳峭寒生刻玉堆鹽尾鬣成
當道豺狼應辟易攫人羆虎漫紛爭
來從萬里冰霜路氣寂中宵雞犬聲
曾吼文殊清淨座緇塵肯湮市朝行

縱有探微善寫生未如滕六幻裝成
鉗椎不借紅爐力

用宋僧仲殊詞中語

筋骨疑堪造化爭瞋目奮鬚威見齒
效鋒斂鐔

靜無聲分明一片豐年玉神物何緣地上行

和人二首

春明接浙記分襟歲晚冰霜感宴陰
萬里雲天瞻魏闕七年海日照葵心
豫且網密魚驚沼阿閣巢傾鳳失林
一曲金徽彈古調宮商哀怨不堪任

蠲軀國士定何時頽舍空聞一木支
雪暗軍營朝從獵風清水殿夜吟詩
投荒速謫宜通隱經國多才職論思
人事變遷論剝復茫茫天意故難知

○送鐵師北行

薊北荒阡鶴未歸江東幾度望雲飛
身依佛日年華老夢遶泉途孝養違
風雪欲冰游子淚緇塵愁染衲僧衣

帝臺雲谷焦崖石回首松杉冷翠微

○立春日對酒

霽日融庭雪春生在臘前寒從今夕盡暖較去年先月
皎妖暮退是夜月蝕星移斗柄旋陽和滿天地已到綠樽邊

